

84
Р.59

ЗОЯ РОГОВА

Мишук воліє Рачіо





g/x

84
P. 59

ЗОЯ РОГОВА

КОНТРОЛЬНЫЙ
ЭКЗЕМПЛЯР

Мишук волис Раяо



Висътъяс, мойдъяс

СЫКТЫВКАР
КОМИ КНИЖНОЇ ИЗДАТЕЛЬСТВО

1998

359654

Ном:
ДЕТС:
ИМЕНИ

84.(2) Рос–Коми
P59

Тайо книгасо отсаліс лэдзны
Коми Республикаса Юралысьлөн администрация

Серпасаліс *Г. Н. Шарипков*

Рогова З. И.

P59 Мишук воліс Райо. Висьтъяс, мойдъяс.– Сыктывкар: Коми книжнэй издательство, 1998.– 64 л. б.

ISBN 5-7555-0619-1

Зоя Ивановна Роговалөн петавлісны нин челядлы лыддьом выло «Куим чой» да «Ов, Придашой» книгаяс. И со сійо вөзйө ичот арлыдалы ассыс выль небөг, кытчө пырисны и водзті нин йөзөдлөм да дзик выль висътъяс. Чайтам, мый том лыддысьысыяслы воасны сьолөм выло Мишук да мукөд нывка да зонка йылысь висътъяс.

84.(2) Рос–Коми

Р $\frac{4803310100 - 22}{М 128 (03) - 98}$ Без объявл.

ISBN 5-7555-0619-1

© Рогова З. И., 1998
© Шукин Н. А., лөсьодысь, 1998
© Шарипков Г. Н., художник, 1998
© Коми книжнэй издательство, 1998

Мамлы козин

Ичөтик Ваня листалис календарь. Март көкъямысод лунөдз воис да дугдiс листавнысö.

– Нывбабаяслөн празник лун! – гораа лыддис зонка, медым батыс тшötш кывлис.

– Празник, пейй,– шыасис батыс.– Мамыдлы да чойыдлы козин колö лöсьöдны.

– А мый эськö козинсö ньöбны? – юалис Ваня.

– Мый вылö ньöбан? – юалөмөн вочавидзис бать.– Тэ öд сьöмсö он на нажöвит.

Чöv олыштiсны батя-пия. Сэссия батыс мелiа пуктiс кисö пиыслөн пельпом вылö:

– Мамыдлы тэсянь медся дона козиннас лоö бура велöдчөм. А чойыдлы мыйкö серпасав, тэ öд кужан.

Бать сетiс пиыслы выль альбом да карандашъяс. Дас кык карандаш: став рөмъясөн пöртмасьысь öшкамöшка позяс рисуйтны!..

Карандашъяссö ёсьталөм бöрын Ваня вель дыр мөвпалис: «Мый эськö рисуйтны?» Рытивбыд майшасис – нинөм эз серпасав.

Вель дыр жугліс юрсö. Но медбöрын радио отсаліс!..
Нималысь артистка Валентина Есева буретш вöлі сьылö
«Шондiй, мамöй!»

– Мамöй тай шондi вöлöма! – ловзис ичöтик Ваня.
Зэв öдйö рисуйтiс лöz енэж да югөръяс койысь гөрд шондi.
Серпас улас гижис: «Тайö – дона мамöй, став гортсаяс-
лы сетö гаж, югыд да шоныдлун». Татшöм мелi кывъяссö
Ванялы унаысь шульвліс бабыс.

Мöд лист бокö Ваня серпасаліс дзоридз. Сы улö ги-
жис: «Тайö – чоюк». Татшöм кывйөн мамыс ошкывліс
чойсö.

Кöть праздникыс бабъяслөн, мамъяслөн да чойяслөн,
Ваня рисуйтiс и батысö да асьсö.

Дзоридзкөд орччөн сiйö серпасаліс джуджыд да паш-
кыр кыз пу. «Тайö – батыö», – шуис Ваня. Сэсса татчö
жö рисуйтiс ичöтик лэбачös. Мый вöсна эськö? Чойыс
Ванялы частö шульвліс: «Бордьясьысь лэбачпи моз кот-
ралан да чеччалан...»

Бинокль

Андрейлы вöлі көкъямыс арös, кор батыс муніс фронт
вылö.

– Ме пыдди колян, – малаліс батыс детинкалысь
еджыд юрсисö. – Кывзысь мамыдлысь.



– Бать, тэ локтігад меным бинокль вай. Война вылад
өд сійө уна.

– Вая-вая, – көсйысис батыс.

– А кор локтан? – меліа видзөдліс батыссы синмас
Андрей.

– Регыд, дона пи, регыд. Вермам лёк вөрөгөс, и гортө.

Андрей быдөнлы ошйысис сиктын, кутшөм козин
көсйысис сылы батыс.

Колис сэсянь куим во. А батыс век оз лок.

Первой кадас тшөкыда волывлісны письмөяс. Ма-
мыс зэв кыпыдырысь восьтыліс найөс. А өти письмө
мамыс шогпырысь босьтіс киас. Сы бөрын сэсся почта-
льонша эз кут кежавлыны на ордө. Усьөма батыс фа-
шистъяскөд косын.

Андрей мый вермис отсасис колхозлы. Первойсө юр
кыскаліс, а коймөд гожөмнас куртны да ытшкыны нин
велаліс.

Войналөн нельөд тулысын воис фронт вылысь Ивө
Прокө. Чотіс, өти кок пөвсө гөгрөс пуысь вөчөмаөсь.
Армияө мунтөдз сійө колхозын юралысьөн вөлі, а мыйөн
воис, бара важ уджас кутчысис.

Видз вылө петан кад воис, шуисны котыртны торъя
бригада, кодлы вөлі индөма пуктыны турунсө Гагшор
йылын. Кызвыннас ылыс участокө өкмис челядюлов.
Сэтчө жө сюртчис и Андрей.

Андрей куртіс. Сетісны аслыс вөв да куртан машина
дөзьөритны. Ыркыд төвруа лунъяснад дивъя гижлавны
шыльыд видзьястө. Тырас кос турунөн машина гыркыс,

личкыштан кокнад рычаг вылас, кинад отсыштан помөдз пиньяссö лэптыштны. А кымöра лунъяснас матö волан, лөддзыс вöвтö вильöдö, гебйыс синмö сатшкысьö. Кузь каднад Андрей век жö велалыштіс кутшöмакö на дінö.

Сэтшöм здукьясьö, кор видз вылö волö председатель, челядь чукöртчылöны тшынас дорö.

– Зільöй, зільöй, том войтыр, – ышöдö Ивö Прокö. – Уна турун заптам – мöсьяс пötöса тöвъясны. – Здук кежлö чöv усьлö, сэсся содтö: – Ставныдлы козьналам ситеч дөрöм да сатин гач.

Андрей синсö эз лэдзлыв председательлөн бокас öшальсь бинокль вылысь.

– Мый, кажитчö?

– Зэв ёна, – гөрдöдіс Андрей. – Позьö видлыны?

Андрей вель дыр бергöдліс киас öтарланьö вöснялысь трубасö. Öтилаті весиг нюкыльтчыштöма, осколок либö пуля, кöнкö, чирснитöма. Видзöдліс ты мöдарö, дзик ныр улас эжөр костас уткапиян уялісны. Сё дивö! Дзик мойдын моз, тэ аддзан, а тэнö – оз. Но и добра!

– Бать татшöмös жö кöсьысьліс вайны, – ышловзис Андрей да мыччис бинокльсö Прокö дядьлы.

Арнас пелькöдöм-мичмöдöм школаö локтісны председатель да тшöтовод, моздор тыр вайисны челядьлы козиньяс. Öтияслы – мича дөрöм, мöдьяслы – лыжи, коймöдьяслы – книга.

Андрейös чукöстісны жö пызан дорö.

Председатель, Ивö Прокö, лышкыда нюммуніс, сэсся и мыччис зонкалы кутшöмкö көрöб.

– Мый нө тәни? – Андрейлөн пышкай моз жбыркнитіс сьөлөмыс.

– Восьты да видзөдлы, – вашъялө председатель. Андрей тірзыштысь киясөн восьтіс.

– Бинокль! – ылькнитчысь радлунөн горөдіс шемөсмө Андрей. – Тайө меным али мый, Прокө дядь?..

– Тэныд, дерт, кодлы нө сэсса, – шуис председатель. – Тэ медбура уджалін видз вылын. Молодеч!

– Прокө дядь, ме сөмын некымын лун... Öти вежон, гашкө, новла... И бөр аслыныд бинокльсө сета. Тіян вед тайө.

– Бөр эн вай, – сьөлөмсянныс шуис председатель. – Вөдитчы и казтыв батытө. Бур морт сійө вөлі: зіля уджаліс колхозын, смела тышкасис фронт вылын.

Куим чой

Урокъяс бөрын Мария Ивановналы, коймөд классын велөдысьлы, паныдасис Нина Лыткиналөн мамыс да вель дыр норасис нылыс вылө. Ньөти пө оз кывзысь, асныралө, гортын оз отсась. Ті көть пө, Мария Ивановна, отсыштөй кызкө, тіян дінын өд нывкаыс велөдчө.

Дзугыльмис Мария Ивановна, а сэсса рытывбыд думайтіс аслас велөдчысьяс йылысь. И уна мукөд нелючки на казяліс сійө: өти омөля велөдчө, мөд со талун пөим

чукортанінысь пышйис, коймод дневниксыс оценкаяссö
вежлалöма...

А öд быттö ставыс тырмö челядыслы: сёян и юан,
көм и паськөм, книга и тетрадь. Сöмын велöдчы...

Аскинас чужан кыв урок вылын Мария Ивановна
лыддис война кадся олөм йылысь кывбур. И кор казяліс,
мый челядь сьөлөмсяныыс кывзöны, содтіс:

— Көсьянныйд кө, ме нöшта на висьталышта тіянлы
сэкся олөм йывсыс. Ме сэки буретш тіян кодь арлыдаөн
жö вöлі...

— Висьталöй, Мария Ивановна, висьталöй! — корис-
ны челядь.

— Öти сиктын мамныскөд олісны куим чой, батыныс
вöлі фронт вылын, — заводитіс небыд гөлөсөн учительни-
ца. — Олісны омöля, трудоденьяс вылө нянь юклісны
этша, эз тырмыв сійö, и мам ассыс пайсö век вичмөд-
ливліс челядыслы. Тшыгьялөмла да сьökыд уджла мам
ёна висьмис. Öти рытö сійö корис куим чойöс аслас воль-
пась дорö дай шуö:

— Дзикөдз тай ме висьми, кагаясöй... Мыйкө кө мекөд
лоö, гортысь некытчö энö мунöй, öтлаын кызкө олöй...
А сэсся регыд батыныд воас фронт вылысь...

Куим чой пукалісны да бөрдісны мам вольпась дорын —
ичөтикөсь, жебиникөсь. Медыджыдыслы вöлі сöмын на
дас арöс.

Недыр мысти мамныс кувсис. Локтісны сельсöвет-
сянь, медым мөдөдны челядьöс детдомö.

— Ми некытчö гортысь огö мунöй, — шуисны чойяс.

— Кыз он мунёй? — чуймис сельсоветса юралысь. — Код нё кутас видзны тiянёс? Вердны да юктавны?

— Асьным, — водзё пыксёны чойяс. — Ми кутам овны гортын. Мам кулигас корис гортнымёс не эновтны!

Кутисны овны куим чой ас кежаныс. Луннас ветлёны школаё, велёдчёны ставныс зэв бура. Урокъяс бёрын став школаён тшөкыда ветлывлісны чукөртны пөим, көрта көлуй, мед сыысь выль танкъяс вөчисны да өдйөджык нин пасьвартісны вөрөгөс... Пөшти быд асыв ломтывлісны ыджыд пач, медым пөжалыштны картупельысь сөчөнъяс. Сьөкыдырысь ломзыліс пачыс, подйыс кузь, зырийөн оз судзны пессө сюявны да эбөсныс абу. Медся ичөт чойлы ковмывліс быд пөрийө пыравлыны пач пытшкө, бура тэчны сэні пессө, ломзёдны и өдйө бөр петны, медым не пөдны тшын пиас.

А кызди помасис школаын велёдчан во, петісны куим чой колхозной уджъяс вылө. Град йөрын киськалісны пуктасъяс, весалісны ёг турунысь, видз вылө ветлывлісны куртны турун.

Өтчыд видз вылысь локтём бёрын аддзисны почта кудйысь письмө. Сэні юөртісны, мый фронт вылын герой моз пөгибнитіс батыныс...

Мария Ивановна чөв усис, сьөкыда ышловзис. Классын вөлі шы ни төв.

— Мария Ивановна, а мый водзё лои челядыскөд? — друг юаліс Нина Лыткина. — Эз кувны найө?

— Эз кувны. Олісны, быдмисны и велёдчисны. Куим чой пыысь өтиыс, Маша нима, со тiян водзын сулалө.

Челядь шөйөвошисны, эз төдны мый и шуны. Мед-
бөрын сийө жө Нинаыс зэв пөся шыасис:

– Со кутшөмөсь ті вөлөмныд! А ми немтор эг и төдөй...

– Быд морт, ёна кө көсийө, винелөн овлө, став сьөкыд-
лунсө вермө, – помалис велөдысь.

Букет

Воис тулыс. Митялөн мамыс өшинь ув йөрын лөсьөдіс
градъяс, дасьтіс көйдыс, пуктіс град вылө лук, морков,
свеклө.

А Митя котрالیс мамыс дорын.

– Митя, тайө град помсө ог пукты, а коля тэныд.

Митя чуймис, весиг котравнысө дугдіс.

– Мамө, мыйла мем сийө градйыс?

– А тэ тані быдты дзоридзьяс. Уна пөлөсөс, мичаясөс.

– Мыйла мем дзоридзьясыс?

– Кыдзи мыйла? Тэныд ковмасны дзоридзьясыд. Тэ
жө, Митя, таво пыран школаө велөдчыны. Медводдза-
ысь школаө мунігөн быдөнлы колө букет. Сентябрь
медводдза луныс ыджыд празник. Ставыс школаө сэк
мунөны дзоридзьясөн. Тайө град помас ми көдзам дзо-
ридз көйдыс. А тэ, Митя, кутан быдтыны-дөзьөритны,
весавны, ваөн киськавны. Школаад мунан аслад быдтөм
букетөн.

– Мамө, вай өдйөджык көдзам дзоридз көйдысьястө, – и Митя радлігтыр заводитіс отсасьны мамыслы.

Детинка гожөмбыд дөзьөритіс дзоридзьяс, весаліс ёг турунысь, тшөкыда киськавліс ваён, небзьөдліс мусө.

А кутшөм мичаөсь быдмисны! Ветлысь-мунысьяс пыр радлісны Митялөн өшинювса дзоридзьяс вылө.

Воис школаө муна лун.

Митя да мамыс вөчисны дзоридзьясысь мича букет.

– Мамө, кыкөс вөчам букеттө.

– А кодлы мөдсө? – юалө мамыс.

– Вася тшөтш мунө школаө, а сійө дзоридзьяссө эз быдты.

– Но сідзкө, вөчам кыкөс.

Мөд букетсө сетісны Васялы, и кык друг радпырысь мунісны школаө, первой классө.

Сьөд сера кукань

Өтчыд төвся рытын Коля вөлі аслас жырйын вөчө урокьяс. Пукалө, нокө задача. Друг кухнясянь кыліс мамыслөн гөлөсыс:

– Бать-мам собрание вылын Колялөн класснөй руководительыс, Анна Ивановна, көсйысис гожся каникульяс дырйи найөс, кодьяс бура велөдчөны, нуөдлыны карө экскурсия вылө.



– Миян Колялөн эмось «тройкаяс», оз кө кут бура велөдчыны, экскурсия вылад оз и босьтны, – вочавидзис бать.

Коля кыліс тайö сёрнисö.

– Карö нуласны бура велөдчысьясös?.. А ме көсья жö ветлыны карас. Ме некор на сэнi эг вöвлы. Бырöда «тройкаясös». Ме öд верма, көсья кө.

И Коля ас водзас пуктiс мог: велөдчыны сiдз, медым ёртъясыскöд ветлыны карö экскурсия вылö.

Воны кутiс тулыс. Ывла выв сiдзи и кыскö челядьöс ворсны. А Коля пыр, кытчöдз оз эштöд гортса уджъяс да кытчöдз оз отсышт мамыслы горт гөгөр уджъяс вöчны, ывлаö ворсны оз пет.

Бать-мам радлісны, мый Коля и велөдчыны бура кутiс и горт гөгöрын отсасьны вевъялö.

Школаын медбөръя звöнок. Учительница Анна Ивановна сеталiс дневникъяс. Кор Колялы кутiс сетны дневниксö, шуис, молодеч пö, Осипов Коля, во заводитчигөн вöлі слабиникөн, а во помалiс бурьяс лыдын. Коляös пö тожö карö экскурсия вылö нуöдлам.

Колялөн радысла зэв тшöкыда заводитiс сьölöмыс чеччавны, гусьөн мөвпалiс: «Карö, ме карö ветла, быдтор аддзыла. Ок кутшöм бур! Мед эськö öдйöджык!»

Гортö школасянь Коля локтiс котөрөн.

– Мамö, мамö, ме бурьяс лыдын, вуджи нельöд классö, видзöдлы дневникös, – и радпырысь чургöдiс мамыслы ассъяс дневниксö. – Мамö, миянös регыд нуласны карö экскурсия вылö, видзöдлам музей, волас пö цирк,

быдтор аддзылам, теплоходон мунам. А нуоны сомын бура велодчысыясос. И мено тшотш. Анна Ивановна мено шуис молодечон.

– Бур, зэв бур, дона пиук. Ме тожо молодечон шуа, – и мамыс кутлыштіс писо. – Ветлан каро. Ме тэныд карад мунигкежло ньоба виль костюм, и сьом сета мороженой выло, и ношта асльд, мый колло, ньобан карсыс.

Отчюд гожся луно которон локтіс Колялон другыс Ваня:

– Коля, Коль! Одиоджык школао котортам. Анна Ивановна чукортто. Аски по каро теплоходон мунам, экскурсия выло.

Кор ставон чукормисны, Анна Ивановна висьталіс:

– Аски нель час рыт кежло ставныд чукортчой школа доро. Босьтой аскодныд сьом, сэн кутам сейны столвойын.

Мод луннас мамыс Колялы ставсо лосьодіс: виль костюм, мича дором, виль ботинки.

Мам муном борын Коля бура майтогон мыссис, котортліс другьясас, ичот чойыскод ворсыштіс, рытладор пасьтасис – ставсо вильос кышаліс да кымынысько матыстчыліс ромпоштан доро видзодлыны ас вылас. А мамыс век абу... и оз лок.

Нель часын школа дорын волины нин ставон.

– Но, быдон дась туйо, сьомто быдон босьтинныд? – юасис учительница.

– Ок, а менам сьомыд абу, мамо косьис сетны, но эз на во удж вывсыс. – Коля места вылас эз ошйы. – Анна

Ивановна, ме котөртла гортө, өні, гашкө, мамө гортын нин. Ті мунөй, ме суода.

– Бур, ми мунам. Тэ сөмын, Коля, өдйөджык суөд миянөс, – вочавидзис учительница.

Мөдөдчисны чукөрөн пристаньө, Эжва дорлань. А Коля котөртіс гортланьыс, гортыс ылын вөлі школасянь.

Мамыс гортын нин виччысис писө.

– Коля, тэ мунөмыд нин? На сьөмтө, мун өдйө суөд. А ылынөсь кө нин, Коля, тэ видз вьвтыс весьтасав, ты помтыс, сэні эм векньыдик туй и котөрттөг веськыд туйөдыс найөс суан, – велөдіс мам. – Но мун, бур туй! – мамыс кутыштліс Коляөс. – Мен удж вылө на ветлыны колө.

Сикт помын гөра йывсянь Коля аддзис мунысь челядь чукөрөс, ылынкодь нин вөліны. «Но сідзкө, ме муна веськыда, ты помті». И кежис векньыдик ордым вылө.

Ты помын быдмис кузь эжөр турун и вөлі вутшкөсь. Коля чеччаліс вутшысь вутшкө.

– М-м-м, – друг кыліс ымзөм шы.

Коля повзис, сувтіс, гөгөр видзөдліс, матын некод абу, некод оз тыдав.

– М-м-м... – бара дзик матын, Коля дорын, эжөр пөвстын кыліс ымзөм шы.

– Мый тайө, коді тані?.. – и мөдіс сюся видзөдны гөгөр.

– Ты помын, эжөр пөвстын, мыйкө вөрис. Коля вутшысь вутшкө чеччалөмөн матыстчис... Кукань!.. Сьөд сера кукань!.. Вөйөма нюйтас, кынөмөдзыс пырөма, кайныс оз вермы. «Кыз сійө татчө воис?»

Коля дрөгнитіс: «Теплоход воис!.. А ме... ме коли, коть' и которта, ог су, пристаньодз зэв на ылын».

— М-м-м,— ымзіс потшъяс вылын куйлысь кукань.

Коля шемөса сулаліс кукань дорын и вөлись аддзис выль костюмсьыс да ботинкисьыс виялысь нюйт да няйт сора васө.

Мый вөчны? Заводитліс Коля кыскыны потшнас куканьсө да оз вермы, некыдз оз вермы.

— Тэ тан куйлышт, донаөй,— малаліс съод сера куканьөс Коля.— Ме котөртла сиктө да тэнө нуам вөлөн, телега вылын.

И детинка котөрөн мөдөдчис сиктлань.

Ба-бе-е

Пөрысьмыны кутіс Марья баблөн Марта нима көзаыс, коді дас во чөж вердіс сійөс чөскыд йөлөн. «Колө мамыс кодьөс жө вежом вылө быдтыны»,— мөвпаліс баб, кодыр тулысладор Марта козыналіс куим ичөтик көзапиөс. Эньыс вөлі сөмын өти и сійө зэв нэриник да косіник. Содтөд войнас гидас төкөтьө абу гегдөма, кок йылас оз сувт ни нёнясьны оз путымы.

Марья баб еджыд көзапиөс кагаөс моз топөдіс морөс бердас да пыртіс керкаө, шыльөдіс-мольөдіс, пөляліс нырвомас. И со ловзыны мөдіс, меліалөмыд, буракө, бы-

дөнлы эбöstө содтө. Выль олысьöс баб нимтіс Розаөн, лөсьöдіс резина нён да ичөтик сулеяысь вердіс йөлөн. Ловзян нянь моз Роза мөдіс туны-быдмыны, лунысь-лун збоймис да шыляліс, еджыд пасьыс лөставны кутіс. Быдлаө чеччыштө: койка вылө и пызан вылө. Öтчыд весиг, кодыр бабыс эз вөв гортас, пыравлөма пач пытшкө, ёна и пуртікасьöма пөим пиас.

Марья баб воис гортас да зэв ёна повзис: еджыд көза пыдди керкаөд котраліс сьöd. Эз-ö кодкө Розаөс веж? Но бурджыка видзөдліс да гөгөрвоис помкасө.

– Но и быдтас, но и кывзысьтөм рөд, – норасис Марья баб Розаөс тазйын мыськалігөн. – Веськалін кө öд, йөюк, пөсь шыд чугунас, сәні пусин.

Воис шондіа тулыс. Вежөдіс керкадорса луд. Марья баб, Марта да Роза петісны ывла вылө гождйөдчыны. Ок и гажа жө тулысыд! Көзапи кольмис чөскыд сынөдсьыс, ризъялө-котралө, пөтны оз вермы. Öдөбтчас да лыйыштас кытчө веськалө, швачкыяс плешнас потшөсө, видзөдө – потшөсыс дзонь и плешкыс абу потөма, – шензынысө оз вермы. Нимкодь! Сэссия бара выльысь котөртас. Дурө, кытчөдз юрыс оз висьмы. Сэссия заводитіс вөтлысьны туй кузя мунысь-локтысьяс бөрся да дэльөдчыны кычияскөд. Паныдасис пашкыр гөна ыджыд пон, уськөдчис сы бөрся.

– Ав-ав, – петкөдліс Розалы ёсь пиньяссө пон, повзис көзапи, баблы сарапан улө дзебсис.

– Йөюк, төд кодкөд ворснытө, – малаліс юрөдыс да велөдіс баб.

Роза первойысь на лэччис шор дорö, кызди адзис волялысь веркöса лöнь тыкöла, веськыда нем думышттöг чеччыштіс сэтчö, чайтіс исковтны шылыдінтіыс мöдара-рас. Сы пыдди юр вывтіыс бузгысис кöдзыд ваö. Кыпаліс да мöдіс тэрыба шенасьны кокъяснас, первойсö Роза вöлі сöмын места вылас кытшлалö, сэсся ладмöдчис да берегас уйис.

Пыркнитчис Роза, йирыштіс веж турун сіяс, куйлыштіс шонді водзын, бара лысьöмыс кутіс гилявны. Керьяс кузя тшолкöдіс-ветлöдліс, статьялунсö лöсьöдіс, сэсся мöдіс потшöс вылö кавшасьны. Ок, сьöкыд «гимнастика» вöлöма, сёысь турбыльтчыліс. Видзöдö, öтилаті майöгьясыс чашмунöмаöсь, асьныс корöны, чеччыштны тшöктöны. Лыйыштіс. Неуна сорсьыштіс, кöзапилөн морöсыс эз төр, сьылісö жмитіс, кокъясыс муöдзыс эз воны, öшйис. Тадзи жö кымын Марья баб джодж мыськан ветьöксö быгöдлö.

– Бе-бе, – горöдіс Роза. Дінтіыс бергаліс повзьöм Марта мамыс, но отсавны эз путьмы.

– Ба-бе, ба-бе-е! – мöдіс чарзыны шöйöвошöм кöзапи.

Кыліс Марья баб Розалысь норасьöмсö, локтіс да мездіс.

Тадзи Роза велаліс вартчыны да видзчысьны скөр поньясысь да баксöмөн чуксавны кöзьяйкасö, кор веськалас дзескыдінö.

Öні на зэв шаня олöны Роза нима кöза да Марья баб.

Вурсьысь

Танялөн ыджыд чойыс, Маша, кужис вурсьыны. Танялы окота жö лои велöдчыны да кутис Маша дорын зыньгыны:

– Вай ме вурся жö, ме öд мичаа кута.

– Зэв на ичöt, быдман да сэки,– стрöга вочавидзис Маша.

Но Таня эз лэдзчысь. Сэки Маша сетис ичöt чойыслы ситеч тор. Емö пысалис сунис, и Таня зэв радпырысь кутчысис удж бердö. Недыр вурсьöм мысти Таня казялис, мый емыс абу.

– Емöй кытчöкö воши,– няргыштіс Таня.

– Корсь, воштін кө.

Таня быдлаысь корсис, но емыс эз сюр. Ковмис Машалы энотны вурсянсö да тшötш корсьысьны.

– Быттö ваö вöйи,– джоджті уялігтыр шуалис Маша.– Эн-ö нин ньылышт? Вомад босьтлін?

– Босьтлі.

– Голяыд доймö?

– Доймö.

– Сідзкö, ньылыштін. Öні кулан.

Таня заводитіс лимзавны. Бördігтыр юалис:

– Мый нö сэсся лоö, збыльысь кула али мый?

Бördöм шы вылö кухняысь локтіс мамыс.

– Мый лои, мый бöрдан, Таня?

– Мамö, ме кула, ме ньылышти ем. Ма-а-мук-ö-öй!

Кöть кыз мамыс эз такöд Таняös, сійö век горзис:

– Мамö-ö! Мамук!

Мам и ачыс тшöтш повзис, но век жö эз эскы, мый Таня збыльысь нылыштис емсö. Бара на быдлаысь кор-сисны, но весьшөрö.

Кор мамыс сыркъялысь Таняöс босьтис моздорас да морöс бердас топöдис, Таня мыйыськö друг ойöстис. Видзöдлисны, а емыс Таня партук зептысь чурвидзö.

– Ок тэ, вурсысь, вурсысь, – сöмын и шуис мамыс.

Самолёт да морт

Коля велöдчис первой классын да дугдывтöг ошйысис ёртъяс водзас:

– Со кутшöм мича самолёт ме кужа рисуйтны! Ад-дзанныд, и пропеллер, и звезда.

Öтчид урок бöрын Коля юалис аслас ёртыслысь, Шу-риклысь, кужö оз сийö рисуйтны самолёт. А ачыс пыр жö пуксис, босьтис бумага лист да кутис рисуйтны быд лунья рисуитанторсö.

Енэжын саякйö-койö югөръяссö шонди. Сыкөд орччөн лэбö самолёт: пропеллера, звездаа, аслас номера.

– Прамöй самолёт кодь, – ошкис Шурик. – А ме со мый кужа рисуйтны.

И сэн жö Шурик рисуйтис мортöс, да сэтшöм лöсьы-да, весиг Коля дыр шензис.

– А ме мортсö ог куж рисуйтны, – жугыльпырысь шуис Коля.

Та бöрын Коля некодлы нин эз ошйысьлы, мый кужö бура рисуйтчыны.

Катялön отпуск

Бабыс ордö гöститны воис Катя внучкаыс. Керкаö пырöмön тшöтш Катя пöся кутліс да окаліс бабсö.

– Ме локті дзонь тöлысь кежлö, «отпускö».

– Зэв бур, мый воин, – нюмъяліс бабыс. – Кызди, Катенька, помалін первой класстö? – юасис баб.

– Зэв бура. Школасянь мамöс аттьöалисны, мый ме отличница, – ошйысис Катя. – А ме вöлі классын командирön.

Мöд асывнас баб дорö пырис бригадир.

– Анна тьöt, он-ö ветлöй капуста град вылысь ёг турун нетшкыны?

– Аттö дивö, менам карса гöстя, да кытчö нö сійöс коля öтнассö.

– Босьт аскöдыд.

– Ладнö, нуöдла и эм. Катюша! – чукöстис бабыс внучкасö. – Ёг турун нетшкыны корöны, а кытчö ме тэнö коля?

– А ме ветла жö.

Бригадир быдөнлы индiс торъя радъяс.
– А тайö, Анна тьöt, тiянлы кык вылö. Мыйöн эштас, верманныд мунны.

– Катя, сöмын капустасö эн вөрзöд, – велöдiс бабыс.

Катя зэв зiля заводитiс уджавны. Пажын кежлö индöм радъясыс весассисны да содтöд на öти рад весалисны. Рытнас Катя азыма сёйис яя шыд тасытi да блюд тыр рок.

– Бабö, зэв жö нин чöскыд тэнад сёяныд...

– Сёй, дитя, сёй.

– Аски бара ветлам ёгтö нетшкыны, – вöзйис Катя.

Ассыс «отпускö» Катя коллялiс зэв гажаа. Бабыслыс став градсö весалис. А дядыс весиг трактор вылö пуксьöдлiс, öтлаын гöрисны. Виль пöдругаясыскöд ветлывлiс купайтчыны.

Катя зэв бура кужис йöктыны, и кор клубын лоис концерт, сiйöс корисны выступайтны. Ёна и клопайтiсны! А клубса веськöдлыс бура йöктöмыс Катялы кöсас кöрталiс еджыд бантик дорö алöй бантик да сетiс мича книга.

Тöлыс бöрын, кор Катяла воис мамыс, медым нуöдны бөр гортас, карö, Катя шуис:

– Мамö, ме ог на мун, менам öд отпускöй эз на по-мась.

– Ов, сiдзкö, дона нылöй, отпускав водзö, – шуис мамыс.

Көч нянь

Коля ичөт на, но ыждавнытө кужө нин. Пуксяс сёйны, да немтор сылы оз шогмы, немтор оз кажитчы.

– Колюк, гашкө, яя шыд панялыштан? – юалө бабыс.

– Ог көсйы! – дузъялө мөдыс.

– Либө еджыд нянь йөлөн сёйышт, – шуө мамыс.

– Ог!

– Гашкө, көлачөн чай юан?

– Ог көсйы!

Тайө сёрнисө кыліс Колялөн батыс, коді буретш вөлі локтөма удж вылысь.

– Коля, а сёйин-ө тэ эськө көч нянь? – юалис сійө.

– Көч нянь? А кутшөм сійө? – эз гөгөрво Коля.

– Став няньсьыс чөскыд! – стөчмөдіс батыс.

Коля кутіс мөвпавны и оз төд, мый шуны, сійө некор на эз сёйлыв көч няньтө. Весиг эз кывлы сы йылысь.

– Вай либө сёйыштам көч няньтө! – корис Коля.

– Кутшөм сюсь! – серөктіс батыс. – Ковмас аскиөдз виччысьлыны. Аски менам шойччан лун. Мунам ми тэкөд вөрө тшак вотны. Мыйён көрзинаясным тшакөн тырасны, сэки и көчыд сетас асьыс няньсө.

Аскинас Коляөс батыс садьмөдіс водз. Зонка өдйө пасьтасис-көмасис, босьтіс ичөтик көрзинка, батыс – ыджыдөс, да и мөдөдчисны вөрө.

Вөрын гажа, лөсьыд, ыркыд. Ая-пия корсялөны тшакь-

яс, вочасөн тыртöны кöрзинаяснысö. Но кöрзина надзöн тырö. Коля нин мудзис, сылөн кутіс сюмавны кынöмыс.

– Батьö, мыйла нö та дыра кöчыс няньсö оз сет?

– Эн тэрмась, – шуö батыс, – кор кöрзинаясным тырöны, сэки и кöч нянь лоö.

Коля котöрөн ветлöдлö пуяс костöд, зіля корсялö гобьяс да масленикьяс, кöйсйö пановтны батысö.

Но со и кöрзинаяс кутісны тырны. Батыс Колялөн гусьöникөн перйис мешöксьыс чышьянö гартовтöм рудзöг нянь шöрöмьяс, кодьясöс пиыслөн тöдлытöг босьтліс сьöрсьыс.

– Эй, Коля! – горöдіс сэсся батыс. – Кöні нö тэ? Кöчыд мем сетіс нин асьыс няньсö. Лок сёям.

Коля котöрөн локтіс батыс дінö, думсьыс зілис адзывны кöчсö, но нель кокаыд эз нин вöв. Зонкалөн ичöтик кöрзинаыс вöлі тырöма тшакөн.

Пуксисны пашкыр коз улö. Батыс босьтіс ыджыд шöрöм, солалыштіс сійöс да и мыччис Колялы:

– На, пиö, сёй кöч няньтö!

Коля зэв азыма пондіс сёйны.

– Чöскыд кöч няньыд? – юаліс батыс.

– Чöскыд, зэв чöскыд вöлöма! – шуис Коля вом тыр-нас няньсö мутшкиг-курччалігтыр.

Медводдза удждон

Көкъямыс арөса Валерик оліс вөр лэдзысьяслөн выль посёлокын, көні весиг эз на вөвны ни школа, ни пекарня. Гождя луньясө Вова другыскөд ворсісны. Другыслөн вөлі аслас ичөтик велосипед.

– Меным тождө велосипед колө,– няргөмөн кутіс корны Валерик батыслысь.– Кор нө ньөбан?

– Кор ачюд најөвитан сьөмтө,– шмонитөмпырысь вочавидзис батыс, коді уджаліс бухгалтерөн лесопунктын.

И со Валерик кутіс удж корсьны.

Мамыс пес пыртлө, а Валерик юасьө:

– Мамө, пес пыртлөмыс удж али абу?

– Удж, дитя, удж, уджав тшөтш мекөд,– вочавидзө мамыс.

Мамыс ведраясөн вала мунө. Валерик бара юасьө:

– Тайө удж жө?

– Удж, удж, дитяөй!

Валерик зіля кутіс отсасьны мамыслы. Керкаас пес пыртліс, ичөтик ведраөн ва ваяліс, эз дышөдчы и дждж чышкыны. Эз вунөдчыв быд асыв асьыс крөватьсө лөсьөдны.

Коркө бара батыслы казтыштіс велосипед йылысь, өні пө өд уджала нин.

– Молодеч, мый мамыдлы отсаян,– ошкыштіс писө бать, сэсся гөгөрвоөдіс:– Мамыд вөчө гортса удж да оз

кор удждон, да и гортса уджсьыд ми некодлы ог мынтысьöй.

Жугыльмис Валерик: «Кытысь и аддзан удждона уджтö?» Тадзи мөвпалігмоз сійö восьлаліс посёлоклөн дзик öтка улич кузя сэтчөдз, кытчөдз ныр на ныр эз зурась Ваня суседыскөд, коді вöлі некымын арөсөн ыджыд-джык сыысь. Тайö кадö Ваня вöлі вөв доддялö. Гожея кадö Ваня уджаліс, орчча сиктса пекарняысь ваяліс нянь.

– Ваня, босьт менö ас дорад уджыштны, – вöйысис Валерик.

– А батыд оз вид? – юаліс Ваня.

– Оз! – нимкодя шуис Валерик. – Сійö мем уджавны тшöктö.

Ваня пуксьөдіс ичөтджык ёртсö телега вылö, киас сетіс кузь ньөр да тшöктіс öдйөджык вөтлыны вөвсö. Висьталіс, мый талун колö регыдджык бөр локны посёлокö. Контораын пö кутасны сетаवны удждон.

Ваня пекарняысь петкөдаліс нянь тыра мешökьяс да сөвтис найöс телегаö. Валерик эз жö уджтöмав – турунөн вердіс вөвсö.

Посёлокö бөр воём бöрын зонкаяс öдйö иналісны магазинö вайөм няньсö, лэдзалісны вөвсö да котöртісны контораö. «Касса» гижöда öшиньдорса öчередьö Ваня бöрся сувтіс и Валерик.

– Меным нö сетасны оз удждонсö, – полөмпырысь юаліс Валерик ёртыслысь.

– Ме ог төд, – нурбыльтіс Ваня. – Батыдлысь юав, сійö öд бухгалтер...

Валерик пырис бухгалтерияö да матыстчис пызан дорö, код сайын пукаліс батыс. Висътасис талунъя уджалом йылысь, кузь ньорйон вöв вöтлөм да турунөн вердөм йылысь. Юалис и удждон йылысь.

– Ладнö, мун сулышт, воас öчередьыс да сетасны, – меліа нюмъевтіс батыс, коді сэсса матыстчис кассир дінö да гусьон шуис: – Сет менам пины кызь вит шайт, менам удждонысь...

Тайö шуöмсö Валерик эз кыв, öні сьлөн юрас жöдзис дзик öти мөвп – велосипед ньöбөм йылысь.

Шыш

Петялөн мамыс мунö нин удж вылö, а пиыс пыр на узьö.

– Петя, чеччы да талун Вова ёртыдкөд ветлөй луннас öмидз вотны. Керöспом йöрын, му боръясас, зэв уна кисьмöма öмидзыс, а рытнас öмидза йöв сөям.

– Но, мамö, ме чечча да пыр жö ветла Вова ордö.

Кык ёрт, сёрнитчөм бöрын, босьтісны дозъяс – öтиыс тасьті, а мöдыс ичөтик туис – да мөдöдчисны Керöспом йөрлань, вөр дорöдз. Недыр мунөм бöрын налы паньд туй кузя локтö тöдтөм баб.

– Кытчö нö, дона пиян, дозъяснас мөдöдчөмныд?

– Ми öмидзла, вёрдорса муяс дорöдз.

– Но-о-о, онö и полö шышъяссьыс? Шышъяс пö пыш-йöмаось да йöзлысь нянь коралöны...

– Бабöй, а кодъяс нö сійö шышъясыс?

– Лёк йöз, донаяс. Кодъяс оз уджавны, гусясьöны, косясьöны, а сэсся мыжсьыс веськалöны тюрьмаö. И сэсь пышйöны, – висътавліс баб.

– Ми ог полöй шышъяссьыд. Ме сійöс та-та-та! Автоматысь лыя, – кинас петкöдлёмөн збоя висътавліс Вова.

Мунісны водзö, öмидза борйö воиг, кык ёрт сюся видзöдісны гөгөр. Абу-ö көнкө шышыс. Вёрдорса му бор дорын некод эз тыдав. А öмидзыс дзик тыр, и найö заводитісны зіля öктыны.

А сійö асывнас водз-водз Иван дядь муніс вөрö тшак вотны. И вöлі нин локтö гортас, петіс му бор дорö и аддзис сы мында öмидз.

– Часлы, вотышта öмидзсö, – шуис аслыс.

Тшак тыра пестерсö пунктіс бөрöзда бокö, пестер вевтсö восьтіс и зіля заводитіс öктыны öмидз. Недыр мысти кыліс сёрни шы и Иван дядь аддзис: кык зонка зіля öктысьöны и оз казавны сійöс. Иван дядь көсйис повзёдыштны найöс да кыз гөлөсөн шуис:

– Дайте хлеба! Дайте хлеба!

Зонкаяс шöйөвошины-повзисны...

– Дайте хлеба! – мöдысь кыз гөлөсөн шуис Иван дядь, а ачыс дзевсис кустъясö.

– Ой! Ой! Шыш! Шыш!

И зонкаяс ньöв моз мöдісны котöртны гортлань мир туй кузя, бусыс бöрсяныыс сувтсөн кайö. Иван дядь

гөгөрвоис, мый эз ков повзёдны челядьсё, и кутіс ше-
насьны да горзыны, мед оз повны... Но зонкаяс ы-ылын
нин шутьёдісны. Петя да Вова, сиктё воём бёрын, став
йёзсё шызьёдісны. Керёспом йёрын пё шышъяс...

А өти зонка пыр жё котёртіс колхоз правлениеё, көні
пукалё милиционер. Недыр мысти челядь чукөр мили-
ционеркөд мөдөдчисны Керёспом йёрлань.

Сиктысь петём бёрын налы паныд локтё Иван дядь,
мышкас пестерын тшак, а киас пестер вевтын тырыс
өмидз. Милиционер сувтөдіс Иван дядьёс да кутіс юась-
ны:

– Кысянь локтан?

– Вёрысь.

– Тан челядь аддзылөмаось шышөс...

– Хо-хо-хо, кутшөм шыш! Сійё ме вөлі. Ме прөста
повзёдыштны көсйи. А найё сідз и шутьёдісны, – прав-
дайтчис Иван дядь.

– Тэ пёрысь морт, тадзи повзёдны челядьёс оз позы!
А найё молодечьяс, мем көсйисны отсавны. Челядьёс
повзёдөмысь тэнё ковмас штрапуйтны, – стрөга шуис
милиционер. И та бёрын став сиктса челядь кутісны
Иван дядьёс нимтыны шышөн.

Öксинь пöч

Гоҗся шондіа мича лун. Сиктын чöв-лөнъ. Вермысь йöз ставныс видз вылынöсь, турун пуктöны. Сöмын ю дорсянь кылö купайтчысь посни челядьлөн чилзöм шы.

Öксинь баб томдырся пöдругаыскöд, Анна бабкöд, пукалöны кильчö пос вылын да нимкодясьöны гажа луннас, важ том кадсö казтылöны. Туй вывсянь почтальон Маша ыджыд сумканас кежис Öксинь баб керка дорö.

– Öксинь баб! Тэныд письмö вая, – öвтчис конвертөн. – Вай йöктышт!

– Мый нö тэ, Маша? Он жö йöктöд пöрысь мортöс.

– Но, сідзкö, сшылышт вай

Öксинь баб лöсьöдыштіс юрсьыс чышъянсö да небыдик гөлөсөн заводитіс:

Томлунöй да том кадöй,

Алöй цвет кодъ томлунöй.

Пöрысьми да омöльтчи,

Жальöн коли гажлунöй.

– Вот и аттьö, зэв мичаа сшылан, Öксинья баб, – шуис почтальон Маша да мыччис письмösö.

Баб кыскис зепсьыс öчкисö, косяліс конвертсö да заводитіс лыддыны письмösö.

– Кысянь нин письмöйд? Кодсянь? – юалис Анна баб.

– Нывлөн, карсянь. Гижö тай, нывкаясöс пö гоҗся каникул дырйиыс мөдöдла тэ дінö, сиктö. Мед пö бабыс-

лы отсыштасны горт гөгөр да град выв уджъяссө вöчны. Да и вөрö пö нуödлыв, вотöс-тшак пö мед вотасны.

– Ыджыдöсь-ö нин внучкаясыд? – юасьö Анна баб.

– Ыджыдöсь, невестаяс нин. Öтиыс нель класс помаліс, а мöдыс öд нин квайтöд классö вуджис.

Баб кутіс виччысьны карса гöстясöс. Быдса во öд нин сиктö эз волены.

И мövпыштіс Öксинь баб внучкаясыслы ньöбны гöснеч. Магазинын зэв нин важөн öшалö мича алöй рöма гипюр ковта. Кор баб пыравліс магазинö, пыр видзöд-лывліс сы вылö, сэтшöма вöлі воö сьölöм вылас сійö ковтаыс.

– Ньöба тайö ковтасö Надялы, ыджыдджыкыслы. А Зиналы платтö ньöба.

Шуис тадзи Öксинь баб и вöчис. Вайис гортас да нимкодясьны оз вермы. Ковта да платтö вылас кыкнан-ныслы вурліс сикötш мольяс. Кык лун ноксис да сэтшöм мича новланторъяс вöчис – сідзи и вералö син водзад уна рömön.

«Но и ёна жö радласны внучкаясöй...» – шудаа мövпаліс баб. Да сэсса нöшта кыкис гардеробсьыс асьыс медся мича да радейтана кык шöвк кöсынка, кодьясöс сöмын новлывліс ыджыд праздникяс дырйи. И радлігтырйи бара пуктіс внучкаяслы гöснеч дорас.

– «Мед новлöны, нимкодясьöны да тшاپитчöны. Ме нö кытчö нин шöвкъяснас муна. Том йöз мед асьнысö петкöдлöны», – ас кежас сёрнитö.

Коркö воисны Öксинь баб ордö нывкаяс: капрон чул-

киаоьсь, босоножкияоьсь, чышьянтөмөсь. Баблы мыйсюрө мамныс мөдөдөма карса сөян-юан гөснечьяс. И баб ассьыс пай көсйис налы пыр жө козьнавын.

— Со и ме тиянлы мыйсюрө дасьти-лөсьөди... Надялы со гипюр ковта, а Зиналы — платтьө сета.

Надя видлалис, видзөдис гөснечьяссө:

— Бабө, мый нө тэ ньөбөмыд, өни гипюрыс абу модаын. Да сэтчө жө морөсас кыөмыд-вурлөмыд мыйкө... Тайөс кө ме пасьтала, став пөдругаясөй кутасны серавны... А-ха-ха! Да нөшта көсынка на дай... Öни йөзыс куш юрси кежысь ветлөны. Юрө өд ог жө көртав чышьян? Мый тэ, бабө, лоин?

И Надя бөр ставсө бабыслы ки вылас пуктис. А сы вылө видзөдөмөн и Зиналы эз туй козиныс: важ нога пө, кольөма нин модасьыс.

Баб босьтис ставсө да бөр суйис гардеробас. Горш диныс гөрддзасис дөзмөмсьыс, синваыс доршасис, вот вот тюрөбтас бандзиб кузяыс. Но кызкө мырдөн асьсө кутис жө и сгөвөра шуис:

— Но, нинөм кө менам гөснечысь тиянлы оз шогмы, и сытөг оланнид.— А ачыс пачводзө мунис да гусьөник бөрдыштитис. Сэтшөм эз ло лөсьыд сьөлөм вылас. Лөгасис.

Кор пуксисны сөйны, пызан сайын кык чөй нюмрасисны:

— Тайө оз ков. А тайө оз шогмы. Сийө абу чөскыд,— и мамыслысь баблы вылө ыстөм карса гөснечсө ставсө өти здукөн бырөдисны, бабыс весиг көрсө некодлысь эз кывлы.

Рытнас баб ломтіс пывсян. Гашкө пө, туйд кынмыш-
тісны да, бусөссисны да, мед шонтысясны. Петісны пыв-
сыны. Баб локнысө нывъяслы петкөдіс фуфайка да шуис:

— Кайиганыд мыш выланыд плавгөй. Төла, да пывсьөм
бөрад мед он кынмөй.

Но нывъяс фуфайкатө өшөдөмаөсь пөварняас тув
йылө.

— Ті нө мыйла паськөмтөг мунөмныд?

— Бабө, йөзыс сераласны... фуфайкааөсь пө...

— Ой-ой-ой! Кутшөм карса госпожаяс воисны! Коді
нө пывсян дорас тіянос сералас? Сэн некод абу. Часлөй,
висьманныд да казяланныд, — ропкис баб.

Мөд рыт кык чөй сиктө гуляйтны мөдөдчисны.

— Босоножкинад энө мунөй. Миян өд сиктад абу ас-
фальтыд. Көмыд няйтас пракмунө. Көмалөй резинөвөй
сапөгъяс. Көть абу нин дзик выльөсь, но дзоньөсь на, — и
сетіс бабыд сапөгъяс.

Нывкаяс зэв неокотапырысь көмасисны да петісны.
Недыр мысти ывлаас кутіс зэрны. Өксинь баб чукөртіс
войтва да ведраөн нуис пывсянө. И мый аддзис? Ой! Но
и нывкаяс! Кыкнан сапөг гозйис сулалісны пывсян өдзөс
дорын. Мунөмаөсь босоножки кежсьыс, а зэрө...

Нывъяс воисны сөрөн. Баб узьөм улө лэдзчысис.
Чөйяс кынмөмаөсь, кокъясныс и паськөмныс ставыс
ва, көмъясныс кыкнаннyslөн оръясьөма-киссьөма.

Өксинь баб бөрынджык чеччыліс, көмнысө да чулки-
яснысө мыськаліс, пунктіс косьтыны. Няйтнас өд сусе-
дыслы дөмны он петкөд.

Өтчүд чуксалө ассыс гөстяссө Өксинь баб:

– Надя! Зина! Чеччөй нин, сөйыштамөй да ветламөй вөрө чөдла. Пасьтасьөй топыджыка, шоныджыка, мед он кынмөй да мед номъяс оз сөйны, – шуө Өксинь баб.

Лөсьөдіс кык гоз сапөг, кык чышьян, кык гач, кык чуман.

– Со ставсө тиянлы лөсьөді. Пасьтасьөй да менө вөтөдөй. Ме өд ньөжйө муна да мөді нин вөрланьыс, – а ачыс мөвпаліс: «Но кызд пасьтасясны, сідзи и олас... Белаласны, номйыс сөяс да, көтасясны да».

Регыд и вөтөдісны бабсө нывъяс – кианыс көрзина, босоножкияөсь, капрон чулки кежысь, чышьянтөмөсь.

– Но, вөтөдінныд? Тадзи и мунанныд? Номъяс өд вильөдасны. Ми өд вөрө мунам, лунтыр кежлө...

– Нинөм, бабусь...

– Воисны вөрө. А чөдъя местаыс ылын. Колө нюр вуджны. А номйыс дзык тырыс, быдлаө сатшкысьөны... Нюрсө вуджигөн босоножкияс ковмис пөрччыны. Көмтөг мөдісны собны, чирзөны-горзөны, ваыс пө көдзыд, кокным пө кынмө и доймалө, номъяс пө юрнымөс сөйөны...

Чөдйыс эськө и уна воис, да эз кутны вотчыны, ном пө сөйө. Зина нин бөрдө:

– Мунам гортө, ой! Номъясыс быдлаө пырөны!..

– Колө өд кывзысьны вөлі. Мыйла энө пасьтасьөй? Менө со оз сөй номйыд. И пасьтасьөмысь менө некод оз серав.

Вотчөмыс эз и артмы: Зина бөрдіс, и Надя нин мөдіс лимзавны.

— Но өні кө кодкө аддзас бөрдөмнүтө и збыль сера-
лас тиян вылын: невестаяс пө бөрдөны, а оз вотчыны,—
шуис Өксинь баб.

Мөдисны гортө тыртөм дозьясөн. Туй вылас зэв чо-
рыда зэрмис, ковмис пу улын сулавны. Нывкаяс кынмө-
ны-тиралөны. Баб аслас юрсыыс чышьянсө Зиналы
көрталис.

Войнас кыкнан чойсө биалис. Өксинь баб вежон
бурдөдис нывкаясөс. Юкталис пөжөм турун ваөн, голя-
нысө пөсь пөйма дөраөн көртавліс. Сэсса баб горт гөгөр
уджъяс вөчас, пуксяс внучкаяс дорас да сёрнитө:

— Өні, донаясөй, кывзөй менсьым да ставсө сюрк-
нялөй пель саяныд. Кывзысьтөм вөсна, тшапитчөм вөсна
дзоньвидзалуннүтө тшыкөданныд. Паськөм вылө сөмын
төлктөмыс вермас серавны. Быд көм-паськөм ас туйө. И
менө ті ёна дөзмөдінныд куражитчөмнад. Гөснеч оз шог-
мы, сөян оз шогмы, көм оз шогмы... А ми кызд быдмывлім?
Пөттөдз эг сөйлөй, көм-паськөм эз вөв. Ме, кор нин ачим
куті уджавны, медводз ньөби аслым штапель платтьө. А
сыөдз быдмигчөж новлі кольөм көм-паськөмсө гырысь-
джыкьяслысь. Дедыд карө мунлөма велөдчыны чойыс
пальтоөн. А ті мода бөрся вөтчанныд, мед эськө пыр выль
вөлі. Сы вылө өд колө сьөм. А ті кымын шайт ас нэмна-
ныд нажөвитінныд?

Нывкаяслы татчө и висьтавнысө нинөм. Яндзим лои.

— Бабушөй, ми сэсса кывзысьны кутам,— шуис
Зина.

— Ме кута көсынкатө новлыны,— шуис Надя.

— Сапөгтөг вöрад сэсса ог нин мунöй, — кык чой пыдди кöсйысис Зина. — Вай миянлы гöснечтö бөр.

И Öксинь баб дасьтылöм гöснечсö бөр сетис внучка-ясыслы.

Мишук воліс Райö

Бать-мамыскöд Мишук оліс карын, велöдчыны таво заводитіс квайтöд классын. Коркö рытнас батыс воис удж вылысь да шуис:

— Аски шойччан лун. Кöсьям Иван суседкöд вотчыны ветлыны.

— Вотчыны?! — зэв öдйö шыасис Мишук. — Менö тшöтш босьтöй, ме некор на эг вöвлы вöрас...

— Ми öд зэв ылö мунам, тöдтöм вөрö, зэв водз лоö чеччыны... Гашкö, зэв сёрон воам, а тэныд колö выль-лун кежлö урокъяс вöчны.

— Ме талун урокъястö вöча. Нуöдлöй. Ме и Иван дядьöс тöда. Коді тай миянö неважөн на воліс? — вöзйысис Мишук.

— Да, сукöд, — бать эз кöсйы босьтны писö, но Мишук сэтшöма мöдіс вöзйысьны...

— Но мед инö ветлö, ыджыд нин. Гашкö, пув тшöтш вотыштанныд, — шыасис мамыс.

– Сідзкө, уроктө вöч да вод, аски водз чуксала, – кыв кöрталіс батыс.

Мöд лунас водз чеччисны, сёйыштисны, бать босьтіс нянтор.

– Гашкө, сёрмам, ковмас нурьясьыштны.

Батыс пестер да кöрзина босьтіс, Мишуклы мыш ноп сетисны да ведра. Иван дядь локтöм бöрын петисны гортсьыс. Час кык кымын автобусöн мунöм бöрын вотчясьяс чеччисны. Пырисны джуджыд вöра, тöдтöм местаö. Мунігас Иван дядь Мишуклы висьталіс:

– Ме кор тэ арлыда вöлі, ёна нин вöрад ветлывлі. Мамököд мунам, пырам ягас да сійö тшöктас шуавны:

*«Кокьясöй пö нуödöй
Чödья-пувья ягö,
Мырпома нюрö,
Озья веретяö,
Тшака раскö,
Льöмья сёртö,
Сэтöра кустö,
Малина кустö».*

А сэсса вöлі воам тшака раскад, чödья-пувья ягад, и мамö бара тшöктас шуавны: «Миян дозьяслы пö тырны да не тöрны». Да нöшта корам кулöмаяслысь: «Локтöй, мамö да батьö, отсалöй миянлы пувсö да тшаксö вотны, дозьяснымöс тыртны. А бöрти локтöй миянкöд сёйныюны...» И пыр вöрсьыд воывлім тыр дозьясöн, öдва кыкыны вермам.

— Сёрнитігмоз пыдөкодь нин вөрө пырисны, гоб кутіс сюравыны. Мишуклы батыс эз тшөкты гобсө босьтавыны. А сэсся мөдісны паныдасьлыны путникъяс, ягсеръяс, ельдөгъяс. Рылладорыс дозъяс кутісны тырны. Та бөрын веськалісны пувъяинө. Уна да сэтшөм гөрд, и вывті гырысь. Сэтчө и ылалісны. Кор ковмис бөр петны, некод эз төд, кодарын туйыс. Бать шуө: татчө пө петам, а Иван дядь — этатчө. Первой өтарө ветлісны, но туйыс эз во. Сэсся мөдарө мунісны, туйыс бара абу.

— Но и ылалім кө-а,— шуис медбөрын Иван дядь.

Төдтөм вөр. Дзик нин рөмдігас воисны ичөтик ёль дорө, көні буретш ключ петө. Аддзисны чибльөг. Веськөдісны горшнысө, а сэсся син уланыс веськаліс кок туй. Мөдөдчисны сы кузя, да регыд тыдовтчис ичөтик вөр пывсян. Пытшкөсас вөлі пач, пызан, нар. Бать аддзис пөрт. Ывлаын заводитіс нин пемдыны.

— Но, дона пиёй, ковмас тані миянлы узыны.

— Узыны кө и узыны,— шуис Иван дядь.

Мишукөс ыстісны пөртйөн вала. Иван дядь заводитіс тшак весавны. Аддзисны истөг, кос няньтор. Чай вылө чукөртісны пув кор. Недыр мысти пывсянын лои шоньд, пусис тшака шыд, дась лои чай. Сөйисны-юисны да водалісны. Мишук шөракостас.

А асывнас, кор детинка садьмис, Иван дядь да батыс ломтөмаөсь нин пач, пусьөмаөсь. Луныс мича, шондіа. Нопъясисны да мөдөдчисны корсьны туй. Вель дыр мысти воисны эрд вылө. Тыдовтчисны муяс, сэсся мыльк вылын паськөдчөм сикт.

– О, господь-й, – шуис дзикодз мудзём Мишуклы Иван дядь, – кытчö бара воим-а: адö али райö. Со, Мишук, мыйла ылавлим. Миян мам, кор вöлі шуалö – тырны да не тырны, корö отсавны öктысьлы, вöрас пыр гаралö: «Батьöй да мамöй, индöй миянлы гортö мунан туйсö». А тöрыт ми вунöдiм та йылысь да со и ковмис узыны вөр пывсянын.

Матыстчисны сиктлань да первой керка дорсьыс адзисны нывбабаöс, буретш картофель керис. Иван дядь юалис:

– Адö али райö воим-а?

– Райö! – шуис нывбаба.

Ставöн öта-мöд вылас видзöдöны.

– Мый, мый, кытчö?

– Райö, мися, сиктыслөн татшöм нимыс.

Ставныс серöктисны.

– А кызд позьö карöдз мунны? – юалисны нывбабалысь.

– Сикт шöрас эм магазин, сэтчö волöны карсянь машинаяс, тöвар вайлöны, нуасны.

Магазин дорын збылысь машинаясысь ректисны груз. Вотчысьяс вöзйысисны. И час-мöд мысти воисны гортаныс. Мам петис паныд.

– Ой, господьöй, ловьяöсь воинныд?

– Мамö, ми Райö волiм, – ошйысьыштіс Мишук.

А мöд лунас школаса другьясыслы висьтавліс, кызд найö вошлісны вөрö, узисны вөр пывсянын, а сэсся волісны Райö.

«Кыс, кыс...»

Ичөтик Надя мамыскөд да бабыскөд олісны сиктын. Налөн вөлі съод сера кань. Сійө кыйис крысаясөс, шырьясөс, а гожомнас ичөтик лэбачьясөс.

– Мамө, бабө, Муркаыд бара нин вайө лэбачпиөс вомас! – горөдас Надя. А кань ваяс да пуктас лэбачсө баб водзладорө муас да «няв-няв» шуас. Вайи пө бара сөянтор, гөнсө пө чиститөй-нетшкөй. Баб лэбач гөнсө чукөртө юрлөс вылө, нетшкө да гөнтөгыс лэбачсө сетө Муркалы. – Молодеч, Мурка, бура кыйсян, ассыд кынөмтө вердан...

И тадз вөлі гожөмбыд Мурка кыйсьө. Тшөкыда вөлі вайө ичөт каньпиянөс. Но өтчид вайигас коньөр куліс. Ичөт Надя ёна и бөрдіс. Бабыскөд кыкөн гуалісны Муркаөс гид бокас. Олыштісны каньтөг, а сэсся Надялы пөдругаыс сетіс каньпи. Но сійө эз нин вөв ичөт – ыджыдкодь нин. И нач дивө кодь. Дзик съөд, некөн еджыд чут весиг абу. Надялы кажитчис сійө зэв полысьөн. Пыртөдіс өдйөджык керкаас, лэдзис джоджас, а сійө дзум пырис ичөтик розьөд гөбөчө. Кымынысь Надя да мамыс эз пыравлыны каньөс корсьны. «Кыс, кыс, кыс», – чуксалөны сійөс. Ас кежсьыныс нимтісны нин Марусяөн. А кань быттьө дзикөдз воши. Куим лун гөбөчысь эз петав, нинөм эз сөйлы. Но коркө кутіс жө кывны нявзөм шы да Надя петкөдіс Марусяөс гөбөчысь, вердіс йөлөн, чериөн. Каньыд керкаын олыштөм бөрын



кутіс вöйысьны ывлаö. Надя лэдзис сійöс, да кань котöртіс пес сарай дорö. Розьöдыс пырис сарайö да бара сэсь эз петав кык лун, дзебсясис тэчöм пес костас. Кötь Надя бара жö кымынысь эз пырав сарайö да корсь ассьыс Маруся каньсö. Но мöдыс кык лун мысти век жö петіс и сэтшöм тшыг. А сэсся Маруся кутіс овны керка вевт вылын. Шырьясöс да лэбачьясöс оз кый, а ывлаö петöм бöрын керка пельöсöд кайö вевт вылас да олö сэнi. А суседьяс шуöны, тіян каньныд пö узылö дзик пач труба вылас. Ми пö öшиньянь аддзам.

Баб шогсьö: а усьö кө пö узигас труба пыткас да тшыннас пöдас...

Со татшöм дивö кодь каньöс видзö Надя. Чеччöм бöрас быд асыв кильчö вылö петö да горзö: «Маруся! Кыс-кыс, лэччы лок, ме тэнö йöлөн верда».

И Маруся лэччö керка вевт вывсянь, сэсся чеччыштö кильчö пос вылö да пырö керкаö Надя бöрся сёйны йöв. А бабыс быдысь шензьö: «Но, Надя, вайин жö тэ мянлы дивö кодь каньöс».

Баб да внучка

Анна баб воис гöститны Женя внучка ордас, видлыны сійöс. Женялы нимкодь, бабсö аддзис да. Пидзöс вылас сылы пуксис, кутіс юасьны.

– Бабё, мамё шуё, – тэ пё коркё ме кодь жё ичөт вёлін да ветлін ме моз садикё? Тайё збыль али абу?

– Збыль, донаёй, збыль. – Ме коркё зэв важөн вёлі тэ кодь жё ичөт. Олім ми сиктын, но сэн садикыс эз вёв. А вёлі война кад. Нурьясьлім картопельысь да турун пызысь пёжалём сөчөнөн да шыд пыдди петшөрысь пуём ваён.

Женя зэв лөня кывзіс бабсё дай шуё:

– Дона бабёй, мыйла нё тэ миянё эн волы сёйны. Миян жё быдтор эм, шыд, няныд еджыд и сьёд, булки.

Бабыс нюмьёвтіс, окыштіс Женяёс да шуё:

– Аттьё, донаёй. Но тайё вёлі ёна важөн.

Сэсся друг юаліс:

– А көні тэнад мича аканьыд, кодёс ме чужан лун кежлад ньёблі?

– Ме сійёс унаысь садикё нуёдлывлі, а сэсся воши кытчөкё. Муса бабё, сійё өд бөр локтас миянё, туйсё тёдө нин. Мекөд унаысь воливліс гортё, оз ылав...

Кор баб да внучка орччөн водісны узыны крөватё, бабыс шуё:

– А сэсся мича вёт аддзылам узигён. Тэ, Женя, вётсё аддзывлан али он?

– Ог, дона бабёй. Кыдзи нё ме аддза вётсё. Мамё быд рыт водігөн өшиньяссё занавесалё, сійён и ог аддзывлы вётсё.

Баб кутыштліс внучкаёс да и шуё:

– Ок тэ, дона ныв, төлкыд абу на, унатор на он гөгөрво. Ыджыда быдман да ставсё кутан гөгөрвоны.

Медбур козин

Катя оліс сиктын, быдмыштіс да школао пырис велөдчыны. А сэсса ичөт нывка висьмис. Мамыс нуис сійөс карө. Сэні Катя бурдөдчис да өттшөтш велөдчис школа-интернатын.

Кор воисны төвся каникуляс, локтіс мамыс, мед нуөдлыны нывкаөс гортас. Катя быдөнлы гортаяс пысь вайис козиньяс.

– Со тэныд, Лена, капрон лента, көсатө кыны.

Лена чойыс нимкодпырысь босьтіс кельдылөз лента да пыр жө кутіс кыны көса козыналөм мича лентаөн.

– Вася, тэныд вайи шарикьяс: и гөрд, и лөз, и виж.

Ичөтик Васялы сідзжө нимкодь, оз төд, кутшөм шарик босьтны киас, коді медся мичаыс, а сэсса заводитіс ворсны шарикьясөн.

– Бабушөй, со тайө тэныд козиныс, – Катя мыччис рузумөн гартыштөм ёкмыль. Баб дзөран киөн заводитіс разыны ёкмыльсө.

– Партук тай вөлөма, аттьө тэныд, дона нылөй, козинсьыд.

И бабыс кутыштіс нывкаөс.

– Бабө, партуксө ме ачым вури, а вурнысө велөдісны школаын, – шуис воча Катя.

– Мамө да батьө, ме тіянлы вайи мөд пөлөс козин, – чургөдіс Катя налы ассьыс дневниксө. Мам-бать восьтісны дневниксө. А сэні во джын велөдчөмысь Катялөн

сöмын «пятёркаяс». Кыкнанныс кутлісны да окалісны Катаяс.

— Аттö тэныд, дона нылöй, бура велöдчöмсьыд,— шуисны бать-мам.— Таысь бур козиныс миянлы оз и ков. Водзö тадз велöдчы, быдман да лоан прамöй мортөн.

Шуда Вова

Шуда жö тэ, Вова! — шуывлісны другьясыс Вовалы.— Тэ весиг школаын на он велöдчы, а быдтор нин аддзылін.

Збыль öд сідзи и вöлі. Гожöмнас Вова мамыскöд ветлісны шойччыны Крымö. Мунігас Вова Москваын воліс Кремльö, пыраліс музейясö, ветлöдліс метроын.

А Крымас мыйсö эз аддзыв. Ни öти экскурсия вылö эз сёрмывлыны мамыскöд. Нимкодясисны Ай-Петри гöраөн, пыралісны Воронцов дворецö, ветлісны Гурзуфö, Бахчисарайö, Ливадияö, Симферопольö. Воліс Вова и герой-кар Севастопольö. Эм Севастопольын панорама да диорама, көні петкөдлöма, кыдзи миян йöз асьнысö жалиттöг дорйисны Севастополь кар. А öні öзйö куслытöм би геройяслөн памятникьяс дорын. Аддзыліс став пölös орудиесö, кодөн дорйисны Севастополь: танк и пушка, пулемет и миномет.

Мисхорын Вова мамыскөд снимайтчисны Али-баба разбойниккөд орччөн.

— Ой, кутшөм страшнөй Али-бабаыс, сийө менө гусялас да вузалас Турцияө — медводз полөмпырысь ас кежысь мөвпаліс Вова. Экскурсовод висьталіс Али-баба йылысь легенда: «Мича ныв Арзы лэччис саридздорса ключө кувшинөн вала. Али-баба разбойник важөн нин кыйөдчис мича Арзы бөрся. Друг Арзы кыліс аслас юр весьтысь шы. Эз удит весиг горөдны нылыд, кызди сийөс кватитісны разбойниклөн крепыд киясыс, тупкисны вомсө, гартлісны юрсө дөраөн. Сэсся разбойникъяс Али-баба веськөдлөм улын нуисны Арзыөс мореті Стамбулө. Сэні Али-баба вузаліс Арзыөс, кодысь босьтіс уна сьөм. Дзонь во оліс йөз муын Арзы, шогсис да бөрдіс, сэтшөма гажтөмтчис чужан муысь, бать-мамсьыс, жөниксьыс, кодысь чужис пи. Во кольөм бөрын аслас каганас Арзы чеччыштіс мореө. Мореыс жалтіс Арзыөс, эз вөйт сийөс, а вөчис сийөс васаөн. Сийө жө рытнас васаыд аслас кагаөн уйис Крым берег дорө, радейтана фонтан дінө, кытысь сийөс гусявліс Али-баба.

Сийө кадсяньыс вонас өтчыд, кор гусявлісны Арзыөс, фонтанысь ваыс заводитө петны ыльөбөн и сийө жө здукас море гыяс пөвстысь петавлө васа аслас ичөтик каганас, матыстчылө фонтан дорө, көтөдлө кисө, юрсисө, малалө төдса изъяс, пукалө чөла море берег дорын, видзөдө ассьыс чужанінсө. А сэсся надзөник бөр пырө мореө да вошлө мөд во сийө жө кадөдз».

Сиктса челядь кывзөны Вовалысь висьтсө вомъяснысө паськөдөмөн. И окота быдөнлы сэки на пиысь во-

лыны Крымö, аддзывлыны сэтчöс нималана местаяс, паныдасьлыны васакöд. И дыр кежлö кольöны налөн юр вежöрын шуда Вовалөн мойд сяма висетьясыс. А мый, збыльысь öд шуда Воваыд. Сы мында аддзылöма да сы мында тöдö.

Капитан

Лунтыр зэрис, кисьтис ведраысь моз. Петис шонди. Öшинювса ичöтик ва гуран лои море кодь. Ваня зэв öдйö корсис пуысь вöчöм ичöтик корабльсö, кöрталис сьö вöнь, пунктис юрас матросскöй бескозыркасö, кытчö гижöма «Капитан». И мöдис кыскыны корабльсö «мореöд». Матыстчис море дорö Жучка:

– Гав! Гав! Гав! Капитан, босьт менö аслад корабль вылö, кöсья ветлыны ыли муясö... путешествуйтны...


– Ог босьт ме тэнö, Жучка, тэ зэв ыджыд, вöйтан менсьым корабльöс.

Локтис берег дорö Мурка кань:

– Няв! Няв! Няв! Босьт менö аслад корабль вылö, кöсья видзöдлыны саридзсайса муяс...

– Ог босьт ме тэнö, Мурка, тэ менам корабльысь на ыджыд, вöйтан менсьым корабльöс.

– Ква! Ква! Ква! – ваысь друг мыччис юрсö ичöтик лягуша. – Босьт менö, Капитан, корабль вылад, ме тан



отнам ола, косья аддзывны мукөд лягушаясө, төдмавны, кыдзи найö олöны...

– О-о, Лягуша-квакуша, – нимкодь лои Ванялы. – Босьта тэнö, босьта, тэ ичöтик, нуöда тэнö аслам корабль вылын саридз сайö...

Кöсийс Ваня кутны лягушаös. А сийö ва улö тувкнитис, быттьö эз и вöвлы.

Дыр Ваня корсис ассьыс «пассажирсö», дөрöмыс и гачыс кöтасис, а лягушаыд эз и сюр.

Аддзис Капитанös да сылысь паруса корабльсö ичöтик шырпи:

– Капитан! Капитан! – чилöстис шырпи. – Вуджöd менö саридз вомöныс!

– Тэ ичöt! Босьта! – вочавидзис Капитан.

– Гашкö, тэнад корабльыд розя? Гашкö, вöя? – чилöстис шырпи, повзис да öдйö пышйис. Зэв дыр горзис-чуксалис шырпиös Капитан, но мöдыс эз шыась, кöть и ставсö кывлис.

– Эн пов, шырпи! Аски волы! Аслам корабльöн тэнö саридз вомөн вуджöда, – бөрьяысь горöдис Капитан да мөдöдчис гортлань.

– Ваня, Ваня, кад пырны гортö! – горзис кильчö вывсьянь мамыс. Ваня пырис гортас, а ачыс чуньнас грöзитис:

– Но, Лягуша-квакуша, талун кö эн сюр, ме тэнö аски кута да пуксьöда аслам корабль вылö.

Мöд луннас, кор Ваня петис корсьны лягушасö, саридзис эз нин вöv. Сы местаö кольыштöма ичötтик гöп.

Кытчö нö воши Ванялөн мореыс?

Черысь шыд

Максим да Ваня пырисны велөдчыны первой классө. Ванялөн эм ыджыд вок. Сійө ветлөдлө көкъямысөд классө. А Максимлөн чой-вокыс абу. Асывнас, кор Максим мөдөдчө школаө, мамыс пыр велөдө:

– Тэ, пиукөй, школасыд воан да медводз Ваня другыдкөд гуляйтышт-ворсышт. А сэсся сөйышт, ме тэныд лөсьөда яя шыд да йөв, шыдсө шонтышт плита вылад. А сэсся пуксы уроктө вөчны, а ме воа гортө рытланыс.

Максим пыр тадзи вөчис, кыдзи тшөктө мамыс. Öтчыд Максим воис школаысь, пуктис гортас сумкасө да котөртис Ваня ордө. Сійө ыджыд воыскөд буретш пажнайтис. Сэни жө пукалис Ваня воклөн другыс.

– Лок, Максим, пуксы ме динө, найө со сөйөны черысь пуөм шыд.

А ачыс нюмъялө.

– Черысь пуөм шыд? – шензис Максим...

– Да, да... – шуис зонка, – зэв өд сійө чөскыд. Колөкө ме велөда тэно, кыдзи сійөс пуны. Но сөмын тэ некодлы эн висьтав, мый ме тэно велөди. А висьталан кө кодлыкө, шыдыд оз артмы.

– Но, велөд, кыдзи пуныс, – корис Максим.

– Тэ кастрюляө пукты чер. Эм батыдлөн черыс?

– Эм. – Зэв збыльысь шуис Максим.

– Кисьт ва. Эн ёна уна. И пузьөд плита вылад... и дась.

А ачыс гусьоник пыр сералис.

– Но... талун жö пуа, некодлы ог висьтав, – шуис Максим.

Найö сёрнитігкості Ванялөн сёйсис и кык друг петісны ывлаö ворсны. Кор Максим воис гортас, корсис чер, пуктіс сійöс кастрюляö, содтіс ва да пуктіс пузьöдны плитка вылö... А кор дась лои, видліс шыдсö.

– Тьпу, – сьöлыштіс Максим, – Кутшöм тайö шыд. Прöстöй ва. Пöрьяліс менö. Ачыс öд пыр сералис, а ме йöйыд эски.

Максим черсö вунöдіс бөр местаас пуктыны да колис кухняö. Кор мамыс воис гортас, аддзис черсö да мöдіс юасьны:

– Максим, мыйла тані черыс? Тэ али мый вайин татчö?

– Да, ме пыртлі да вунöді бöрсö петкöдны.

– Мыйла ковмис черыс? – юасис мам.

– Ми школаын велöдім, кутшöм уджъяс чернас вöчöны, – кужис Максим мамсö пöрьявны, а збыльсö эз висьтав. Мамыс кутас видны, дай йöй зонкаөн шуас, мый пö немтор абусö йöзыслысь эскан.

Алёна

Мойдкыс

Визув ю дорын, джуджыд нёрыс вылын сулаліс зэв мича өтка керка. Сэн олісны ичөтик Алёна ныв аслас мамкөд да скөр дядькөд.

Мам унаысь висьтавліс Алёналы баты йывсьыс:

– Тэнад батыд, дона нылөй, вөлі бур, мича, ён. Тэнад, донаөй, ныр-вомыд дзык батыдлөн кодь. Сы вөсна и тэнө вывті ёна радейта. Кор тэныд вөлі кык арөс, батыд муніс визув ю дорө чери кыйны. Но кыпөдчис съөд кымөр, гымалөмөн кыптіс ыджыд бушков. Да сэтшөм ыджыд! Ме полі, мый керкалысь вевтсө төлыс нөбөдас. И батыд, донаөй, веськаліс сэтчө бушков улас. Гырысь гыясыс да бушколыс путкыльтөмаөсь батыдлысь пыжсө визув ю шөрас, да сійө вөйи юас. А ме кутшөма бөрді и өні бөрда, сэтшөм жаль меным батыд.

Мам чышкаліс синвасө, коді тюрис-визувтіс чужөмбанөдыс.

– Эн бөрд, дона мамөй! Эн бөрд! Вай бара сылам мича сыланкывьястө, кодьясөс велөдін тэ, – Алёна кутліс да окаліс мамсө.

И босьтчылісны эня-ныла надзөник сывны нор гөлөсөн:

*...Визув ю кузя,
тэрыб гы вывті
лэбзьө ыджыд пыж
еджыд паруса...*

Мича платтьоа ичотик Алёна бобув моз шпоркьяліс мамыс гөгөр да тшөтш вөсныдик гөлөсөн лывкйөдліс. Весиг ветлысь-мунысьяс сувтлөмөн кывзісны налысь мича сьылөмсө.

Скөр дядь рытнас воывліс удж вылысь гортас, вайліс сьорсьяс сулея вина да юывліс... А сэсся ыджыдаліс мамыс вылын: эз шогмыв сёян, то пось, то сола, то чөскыдтөм. Горзіс Алёна вылө, мыйла сійө дугдывтөг дзользьө да котралө джодж кузя.

Воис гажа гожөм. Алёна мамыскөд тшөкыда ветывлісны визув ю берег дорө, чукөртлісны оз тусь, өмидз, мича дзоридзьяс. Сьывлісны мича сьыланкывъяс. Алёналы вөлі нин сизим арөс. Мамыс унаысь шуывліс:

– Дона нылөй, ме тэныд вура мича платтьө, ньоба мича тупли да портпель. И тэ мунан школаө велөдчыны. Бура велөдчан да лоан ыджыд сяма мортөн – артисткаөн.

Алёна радліс да виччысис, кор нин сылөн лоө выль тупли, мича платтьө, портпель да сійө кутас котравны школаө.

Но лоис ыджыд шог: мамыс виччысьтөг висьмис да куліс. Алёна сэтшөма бөрдіс да шогсис, эз ю ни эз сөй быдса вежон чөж:

– Кыдз нө ме кута овны дона мамтөгыс? Коді нө меным мелі кывсө шуас? Коді нө менө жалитас?

Скөр дядь шуис:

– Кутан мамыд моз мем сёян-юан лосьөдны, пес да ва

вайны, чышкыны да мыськыны керка пытшкös, тшötш и менсьым көм-паськөм мыськыны...

Алёна полігтыр юалис: «А школаö муна?»»

– Школа йылысь бöрын. А öнi уджав, весь эн пукав, – скöра шуис дядь да муніс кытчökö.

Рытьяснас важ моз вайлывліс сулея вина да юлывліс, а сэссия горзіс Алёна вылö:

– Пачтö омöля ломтöмьд! Сёянтö шогмытöмöс пуöмьд! Няйт гачöс абу мыськöмьд! Он кө кут ставсö бура вöчны, ме петкöдла тэныд пуж!

Алёна дзэбсьывліс паччөр сэрöгö шырпи моз да эз лысьтлы вөрзьöдчыны, кытчöдз скөр дядь эз унмовсьлы. Нывка эз тöд, мый сійö «пужйыс» сэтшöмыс, да вывтi ёна поліс дядьсьыс.

Мöд луннас Алёна бара кольліс öтнасөн и лун-лун уджаліс-котраліс: сарайысь пыртліс пес, нельысь ли витьысь визув ю дорö кык ичöтик ведраөн лэччывліс вала, мыськавліс джодж, пеславліс асьыс да дядьыслысь көлуй, сэссия тölöдіс-косьтіс шондi водзын, вурліс да дöмліс паськөм. А рытланьыс ломтывліс пач да пуис сёян скөр дядьлы воигкежлас. И пыр поліс, мед дядьыс эз петкöдлы сылы «пуж». А öтнасөн, горт гөгөр уджалігөн, то бöрдіс да норасис аслас шудтöм олөм вылö, то казьтыліс басьсö да дона мамсö, мыйла найö колисны асьыныс ичöтик нывнысö скөр дядьлы. И сьывлывліс нориника дона мамөн велöдöм сыланкывъяс.

Воны кутіс школаын велöдчан кад, а Алёналөн абу ни мича платтö, ни выль тупли, ни портпель. Öтчьд,

кор скөр дядь воис удж вылысь, Алёна смелмөдчис да юалис дядьыслысь, коді бара нин юис вина:

– Дядьö! Регыд ковмас школаö мунны. Кор мем ньöбан портпельтö?

– Ньöба! – равöстис скөр дядь.

– И нöшта платтьö да тупли, – полігтыр содтіс Алёна.

– Но-о-о! Нöшта тэн мый оз ков?

Дядьыд сөйö вöлі да паньсö ляскис джоджö, зэв скöрысь чеччис, кватитіс паччөр сэрöгын сырмысь Алёнаöс шошаöдыс, кокнас чужйöмөн восьтіс керка öдзöссö да шыбитіс сійöс пемыд ывлаö.

– Со тэныд и школа, и портпель, и платтьö, и тупли! Мун менам син водзысь! – Крапнитіс кильчö öдзöс да гольс игналіс. Алёна шлөпмуніс ва гөптö, көтасис да няйтчис. Ёна доймис киыс. Дыр бöрдіс, чеччыны эз вермы. Но сэссия кызкö чеччис жö. Ывлаыс вöлі пемыд, көдзыд. Сэк жö доймöм киыс юкаліс. Бөрдöмысла висьмис юрыс. Кутіс кынмыны. Но поліс да эз тöд, мый вöчны, кытчö мунны. Гортö он пыр. Сиктöдз вель ылын...

Скöрысь ызгис визув ю. Алёна пуксис джуджыд кыр йылö да бара зэв дыр бöрдіс. Кутіс ёна кынмыны. Кынöмыс сьумалис. И мөдöдчис сэки ю пöлөн мунысь паськыд туй кузя сиктлань, коді вöлі вөр ді сайын. Дыр муніс Алёна, мудзис да пуксис туйбокса куст улö шойччыштны. Мед кынмöмыс да дойыс эз кыв, Алёна босьтчис надзöник сьывны мамөн велöдöм сыланкывъяс.

И быттьö лöсьыдджык да шоныдджык лои. И Алёна вугыртіс куст улын. Унмовсис...

И вѳтасис, быттьѳ скѳр дядьыс сійѳс вѳтѳдѳ, а нывка пышійѳ мый вынсьыс. Со нин джуджыд берег дорѳ воѳны. Вот-вот суас дядьыс да петкѳдлас пуж. Но нем вичысьтѳг кыськѳ лоис вывлань катѳдысь пос, сѳсся мѳд, коймѳд. А улысь содыясыс бырѳны. И Алѳна пыр вылѳ и вылѳ кайис енѳжлань. А дядьыс коли му вылѳ...

И воис зѳв мичаин. Йѳзыс ставыс зарни паськѳмаѳсь, зѳв шаньѳсь да бурѳсь. И керка вевтъясыс югьялисны зарниѳн... Сѳки Алѳна садьмис.

Алѳнасянь неылын бадь вож вылын пукалис да зѳв мичаа сьылис ичѳтик лѳбач. Нывка полис вѳрзьѳдчыны, медым не повзьѳдны сійѳс. И збыльысь, кор Алѳна вѳрзьыштис, лѳбачыд жбыркнитис-лѳбис.

Ывла вылын муртса на югдыштис. А сѳсся мыччысис зарни шондѳ. Алѳна сырмис-кынмис да лѳбачпи моз жѳ мѳдис сьывны. И быттьѳкѳ лои шоньдджык, кынѳмыс омѳльджыка кутис сюмавны. А сійѳ водзѳ сьылис...

И тѳдлытѳг сѳки кылис гѳлѳс:

– Эй! Кодѳ танѳ татшѳм мичаасѳ сьылѳ?

– Ой! Кодѳ тайѳ? – Алѳна повзьѳмысла ланьтис да пыдѳджык бадь улас дзебсис.

– Тайѳ ме, донаѳй. Эн пов. Ме немтор ог вѳч тѳныд. Ме дыр нин кывзѳ тѳнсьыд мичаа сьылѳмтѳ,– шуалис неылын сулалысь бура пасьтасьѳм дядьѳ. Киас кутис шляпасѳ. Ньюмялис, медым нывка эз пов сыысь да петис сы дорѳ.

Алѳна пыр на сырмис бадь улын. Тѳдтѳм дядьѳ юасис:
– Мыйла тѳ тан ѳтнад вѳрас, татшѳм водз? Кызди тѳнѳ шуѳны?

- Алёна, – нора шыасис нывка.
- Көні мамыд?
- Куліс...
- Көні батыд?
- Вао вöйис...
- Кодкөд олан?
- Гортись вөтліс скөр дядь...
- Кытчö мунан?
- Ачым ог төд кытчö. Но гортö ог мун.

Алёна быттö эз кут повны төдтөм мортысь. А дядьö зэв меліа корис, мед Алёна муніс ськөд карö овны.

- Лоан миянлы ас нылөн. Мөвпышт, донаöй!

Алёна дыр мөвпалөм бöрын петіс бадь улысь да шуис мунны төдтөм дядьөкөд карö. Петісны паськыд туй вылө. Сэні сулаліс мича каретаö додьялөм вөв. Төдтөм дядьö пөрччис асьыс пальтосö, тубыртіс Алёнаөс да пуксьөдіс мича каретаö аскөдыс орччөн.

– Но, Савраско! – горөдіс вөв вылас. И сэссия рөдтісны карлань.

Алёналөн карын лои выль мам, выль бать да аслас горт. Кутіс зэв бура овны. Ньөбисны сылы мича платтö, выль тупли да школаö ветлыны портпель. Алёна кутіс велөдчыны бура, вөлі кывзысьысь, зіль да рам. Сэссия велөдчис артисткаö. Кутіс сьывны ыджыд театрын мамысөн велөдөм мича сьыланкывъяс, кодъясөс мукөдъяс эз кывлыны да эз кужны сьывны. И быдлаын сійö кутіс нимаवны аслас мыла гөлөснас.

Ичөтик Петя, Рыжко вөв да Иванушка

Мойджык

Петя мамыскөд карсянь воисны сиктө бабыс ордө. Ста-
выс тани вөли мөд нога карын серти. Гөгөр потшөм йөръяс,
веж турун, мөсьяс да ыжъяс туй кузя кытчаныкө чукөрөн
мунөны, а бөрсянныс кузь ньөрийөн найөс вөтлө тошка
дядьө да горзө:

– Ноко! Энө кольччөй! Вөтөдөй стадасө!..

Мамыс сиктса аньяскөд мунис вөрө тшак да пув вот-
ны. Петя коли бабыскөд, лунтыр котралис, ворсис пон-
пикөд, чукөртис мича дзоридзьяс. А рытладорыс бабыс
сетис сылы ичөтик тасыти да тшөктис град йөрысь өкты-
ны гортса оз:

– Öкты вотөссө тырыс, а сэсся йөлөн сийөс сөям.

Зонка град вылысь медводз чөскыд гөрд вотөссө
пөттөдз сөйис, а сэсся доз тырыс өктис.

– Со, бабө, видзөд, мыйта өкти, да нөшта уна на коли
сэтчө.

– Бур, пиукөй, бур. Бөрти мамыд воас да бара на
йөлөн сөйны өктам, – шуис бабыс.

Гортса оз йөлөн сөйөм бөрын Петяөс кутис унзиль
босьтны.

– Петюк! Гашкө, водыштрам, ме тэн Иванушка йы-
лысь мойда.

Петя друг паляліс:

– Кутшөм Иванушкаөс? Кодөс юсьяс лэбөдөны борд вылас ёма-баба ордө? Тайө меным мамө мойдліс.

– Ог сійөс, ме ыджыд Иванушка йылысь мойда, – вочавидзис бабыс.

Кор водісны, бабыс заводитіс мойдны.

Иванушка батыскөд да мамыскөд олісны сиктын. Налөн вөлі Рыжко вөв. Өтчыд Иванушка батыскөд му-нісны му гөрны. Кутіс пөльтны шоныд лун төв, а сэсса воис кыськө вой төв. Лоис зэв төла. Нюкльөдліс пуяс, чеглаліс пу вожьяс, мусинсө гартлөмөн лэптис енэжас да нинөм эз кут тыдавы. Гөгөр пемдіс... Иванушка баты-ыскөд удитісны чорыда кутчысьны сэні быдмысь ыджыд кыз пуө. Эз кө эськө, и найөс ыджыд төлыс нөбөдіс. Бура дыркодь бушуйтчис ыджыд лёк төлыд. А кор лөнис да югдіс ывла вылын, батя-пия аддзисны, мый Рыжко вөв некөн абу.

– Ой! Рыжко! Көн тэ? – бөрдіс Иванушка, а батысы бурөдіс сійөс:

– Тайө нуис Рыжкотө лёк төлыслөн батысы. Тэн ков-мас ветлыны корсьны Рыжкотө...

Иванушка босьтис нопйө сёянтор да мөдөдчис ылө туйө. Дыр муніс Иванушка да аддзис: сулалө ыджыд яб-лоня пу, а гөгөрыс гылалөм яблөкьяс, орччөн мича ныв бөрдө...

– Отсышт, бур мортөй, мем чукөртны яблөкьяссө... Лёк ыджыд төлыс ставсө разөдіс...

Иванушка отсаліс чукөртны яблөкьяс. Ныв шуис

сылы ыджыд аттё. Иванушка водзё муніс, воис ю дорё, а берег вылас чеччалё чери:

– Бур мортёй, лэдз менё юас. Менё ыджыд тёлысгынас шыбитіс татчё.

Иванушка чериёс лэдзис ваё. Чери висьталіс сылы ыджыд аттё. Мунё Иванушка водзё и водзё, воис кузь вёраинё. Друг кыліс горзём шы:

– Спаситёй! Отсалёй!

Иванушка аддзис: ошлы лапа вылас пёрёма ыджыд пу. Иванушка перйис ошлысь лапасё пу улысь. Ош висьталіс сылы ыджыд аттё. Иванушка муніс водзё. Воис ыджыд стена, а өдзёсыс восьса. Иванушка пырис: мыйыс сэн абу, и Рыжкоыс сэн. Лёк төвлөн батыс шуё:

– Но, Иванушка, тэ вёлёмыд зэв бур морт, кымынёс локтігад спаситін. Сы вёсна ме тэныд бөр сета Рыжкотё.

Иванушка вайёдіс асьыс Рыжкосё гортас. Со та вылын и мойдыслён пом.

– Но, Петюк, сэсса узям да аддзам зэв мича вёт.

И збыльысь, Петя вётасьё да аддзё асьсё зэв смел да ён молодечён, коді отсалё пикё воём йёзлы. И быдён пёся аттьёалё сійёс. А кор садьмис, висьталіс та йылысь бабыслы да шуис медбёрын, мый татшём бур молодечён жё кёсийё лоны ачыс.

– Мед жё збыльмас тэнад мёвпыд, – вочавидзис сылы муса бабыс.

ЮРИНДАЛЫСЬ

Висьтъяс

Мамлы козин	3
Бинокль	4
Куим чой	8
Букет	11
Сьод сера кукань	12
Ба-бе-е	18
Вурсьысь	21
Самолёт да морт	22
Катялөн отпуск	23
Кöч нянь	25
Медводдза удждон	27
Шыш	29
Öксинь пöч	32
Мишук воліс Райö	38
«Кыс, кыс...»	42
Баб да внучка	44
Медбур козин	46
Шуда Вова	47
Капитан	49
Черысь шыд	52

Мойдкывъяс

Алёна	54
Ичöтик Петя, Рыжко вöв да Иванушка	60

Для детей младшего школьного возраста
Литературно-художественное издание

Зоя Ивановна Рогова

МИШУК ПОБЫВАЛ В РАЮ

Рассказы, сказки
на коми языке

Художник *Г. Н. Шарипков*
Редактор *И. И. Белых*
Технический редактор *З. А. Поздеева*
Корректор *Н. Ф. Габова*
Компьютерная верстка – *А. В. Кетова*

ЛР № 010039

Подписано к печати 23.02.98. Формат 70x90¹/₁₆. Бумага офсетная.

Гарнитура «Antigua». Печать офсетная. Усл. печ. л. 4,68.

Уч.-изд. л. 2,74. Тираж 1000. Заказ № 546

Коми книжное издательство.


167610, г. Сыктывкар, ул. Карла Маркса, 229.

Отпечатано в Кировской областной типографии.

610000, г. Киров, Динамовский проезд, 4.



10р.



КОМИ
КНИЖНОЙ
ИЗДАТЕЛЬСТВО
1998